

Juan Jesús Chanĩmara Faafo Kirika Kenexõ Fomani

Jesús noko nimasharaino nõ afe ĩpaxanõ

¹ Ĕkĩa Juan, ĩ mato kirika kenexõ fomai mã tãpinõ. Jesucristo ĩ õimixaki ĩ mato yoi mãri mã tãpisharanõ. Nã Jesucristo nõko Ifokõĩ tae fenakõĩ Nios fe iyopaonixakĩ. Akka Niospa afama mĩshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõĩ keskara nõ õimis. Mã õikĩ feyafaxõ nõ ramãti nõko mĩfi. Nãskakẽ noko yoiaito nikayamexakĩ ĩ mato yoi, noko imasharanõ nõ afe ĩpaxanõ.

² Apa Nios ariax nokoki Jesús ftoni. Fotokẽ nõ õikĩ feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki ftoni. Nãskakẽ nã nõ õia keskara nõ mato yoi.

³ Nõ õipaonixakĩ nõ mato yoi noko yoiaito ãfe meka. Nãskakẽ nofe rafexõ nã nõ shinãĩ keskarari mãri mã shinãtiro. Nios feta ãfe Fake Jesucristo shinãĩ keskafakĩ nõri anori nõ shinãĩ, nõ ato fe rafekõitiro.

⁴ Nãskakẽ ĩ mato kirika kenexõ fomai nã kirika kene õiax mã inimakõinõ.

Nios xafakĩakõĩ ika oa luz keskara

⁵ Akka noko Cristo yoiai, anori ĩ mato yoinõ. “Oa xinĩ chai chaxaino fakishtiroma keskara, xafakĩakõĩ Nios ika. Afaa chaka afe rafemisma,” ixõ Cristo noko yoimis.

⁶ Akka anorima shināi yora fetsafo iskakani: “Ē Nios fe rafea,” ifiaxō a Niospa yoiai anori shināima āa chanī anorima yoi. Āfe ōiti sharama xafakīakōi ikama, fakish keskara a Niospa yoiai anori shināyamafi.

⁷ Nios xafakīakōi ikakī, afaa pishta chakafamisma. Āfe ōiti mēra oa fakish keskarama, xafakīa sharakōi ika. Akka nōri afe rafekōixō, nō āfe meka nō mēra nanekōixō, Niospa shināi keskafakī nōri nō shinātiro. Nō askara shināx, nā Ifofafo fe nō ato fe rafetiro. Nāskax nō xafakīakōi nitiro, Niospa Fake Jesúsmāi noko nāxonikē. Āfe imī nōko chaka noko soaxōfafāini keyokōi.

⁸ Akka nō yoikī iskafamis: “Ē afaa chakafamisma,” ifiax nōa nō pāramemis. Nāskax nōa nō chanīkōimis. Nōko ōiti mēra Niospa meka naneama.

⁹ Akka nō afara chakafaxō nōko chaka nō soapaikī, nō Nios yoiaito nōko chaka noko soaxotiro. Keyokōi noko soaxotiro noko raefakī, Niosmāi mēstekōi isharakōixō.

¹⁰ Niospa yoimis: “Keyokōi yorafāfe chakafamisfo,” noko famis yoikōikī. Noko askafafiaino, “Ēkai afaa pishta chakafamisma, ē chaka shināima,” ixō yoikī nō Nios chanīmara faima, “Āa chanīra,” nō Nios fai. Nāskakē āfe meka nōko ōiti mēra naneima.

2

Jesús Apa Nios noko yoixoni

¹ Efe yora mīshtichi, ē mato shināi. Mē mato Jesús Ifofamaxō ē mato fakefai. Mato fakefaxō ē mato kirika kene fōmai, mā anā afarafo chakafanōma,

shināsharata mā inō. Askara Niospa fichipai. Akka nō chakafaino Niospa fichipaima. Nāskakē nō anā afara chakafxō nō nōko Ifo Jesucristo nō yoitiro anā nōko chaka nō soapaikī, nokomāi nikaito. Noko nikaxō Apa Nios noko yoixononi iskafakī: “Epa, ē ato nāxononi. Eōxō ato chaka soaxōfe, āto chaka soapaikani kiki,” Apa fatiro. Nā fistimāi mēstekōi ixō, afaa chakafamisma. Nāskaxō Apa Nios noko yoixotiro.

² Noko nāxononi nōko chaka noko soaxoxiki. Noko fistima, keyokōiōnoax noko nāxononi. Nōko Ifo Jesucristo noko nāxononi. Nōko chaka noko soaxōfaini nani.

³ Nāskakē Cristo noko yoiai keskafakī nō nikakōixō nō tāpisharakōitiro nōmāi afe rafexō.

⁴ Yora fetsafo isakai: “Ē Cristo fe rafea,” ifiaxō āfe meka nikama, āa akikiri kētapamis, mēstekōi ikama.

⁵ Akka nō Niospa meka nikakōikī nō aō noikōi. Nāskafxō nō tāpitiro nō afe rafekōia, Nios fe.

⁶ “Mē Nios fe rafekōiaki,” ixō yoi, a Jesús imis keskara ikāfe.

Noko meka fena shara yoini nō nōināsharakōinō

⁷ Efe yora mīshtichi, ē mato yoisharakī ē mato kirika kenexoni. Na ē mato yoiai keskafakī tafakī mā mā nikamiskī. Jesús noko yoia keskafakī ē mato kenexonō.

⁸ Mā mā nikafimiskē, ē mato anā fenafakī yoinō chanīma. Jesucristo noko noikōi. Nāskari fakī nō fetsafo noikōi. Fetsafo noikī, nōko ōiti mēra xafakīakōi iki. Anā fakish keskara ikima.

⁹ Akka, “Ē Nios fe rafea ě xafakĩakõi ika,” ixõ nõ yoifixõ nofe yorafo nõ noikaspamis, nõkai xafakĩakõi ikama.

¹⁰ Akka nõroko nofe yorafo noi, nõ xafakĩakõi iki. Nõ shinãsharata nõ ikax, nõ anã fenotiroma. Nãskakẽ nõ xafakĩakõi iki, afaa pishta chaka shinãtama.

¹¹ Akka a afe yorafo noikaspaifo, afokai sharama. Fakish mẽra niafo keskara. Afaakai shinãkanima. Āto chaka xatekaspakani. Askafikaxõ afaa tãpiafoma, fenokõiafo.

¹² Efe fakefãfe, mãto chakafo Jesúsxõ Epa Niospa mato soaxonano, nãskakẽ ě mato shinãkĩ ě mato kirika kenexoni.

¹³ Afaa oniataima Epa Nios fisti iyopaoni. Efe anifo tiito, ě mato kirika kenexoni, afe keskaramãki mã mã Epa Nios tãpiakĩ. Mã mã tãpixõ mã chanĩmara famiski. Naetapafãfe, matori ě kirika kenexoni, Satanás chakata mato afara chakafamapaiyaito mã mã finõfakĩ. Nãskakẽri naetapa tiito ě mato kenexõ fomai, mã Satanás chaka finõano. Efe fakefãfe, ě mato yoikĩ kenexona mãmãi Epa Nios tãpikẽ.

¹⁴ Efe anifo tiito, matori ě kirika kenexona, mã mã tãpiakĩ, afaa oniyataima Epa Nios fisti iyopaoni. Naetapafãfe, matori ě kirika kenexona, mãto õiti kerexkõifafãi Epa Nios ãfe meka shara nikakõiyanã mã mã Satanás chaka finõfakĩ.

¹⁵ Akka a Niospa fichipaiyamai, nõri fichipaitiroma. Afo fichipaikĩ nõ Nios shinãtiroma. Afarafo na yora chakafãfe ãto shinã mẽraxõ shinãifo keskara afo fichipaiyamakãfe. Afo fichipaikĩ mã Nios shinãtiroma.

¹⁶ Akka a Nios shinãifoma nono nãmã ikafo ãa shinãkani iskamisfo: “Ëa ã shinãxõ nã ã apaiyai keskara ã atiro. Afara õikĩ ã fichipaikĩ ã fitiro. Ë tsoa keskarama. Ë afama mĩshti shinãi. Ea keskara tsoama,” ixõ fẽtsa yoitiro ãa chanĩkĩ. Aato Niospa meka shinãima, ãa shinãx askatiro.

¹⁷ Akka na afe keskararafo Niospa õikaspaifo mã afo mitokomei. Nãskatari a yora chakafãfe fichipaiyaifo mã afori mitokomei. Akka nã Niospa yoiai keskara nikakõiax nõ Nios fe nĩpanaka.

A yora chanãaifo nõ nikatiroma

¹⁸ Efe fakefãfe, mã chaima Jesucristo anã nãmã fotoiyoi mã nõ nika. Nãskakẽ Jesús nãmã fotoyomanoma, akka nã yora chakafãfe Cristo shinãmisfoma ãto xanĩfo finakõia oi taei. Nãato, “Ë Cristora,” ixõ noko pãrapaixii. Mã mã tãpia nãato Jesús noikas-pamis. Akka iskaratĩa, “Ë Cristora,” ikanaifo yora ichapakõifo. Nãskakẽ mã nõri tãpia nã Cristo kayakõi samama fotoi.

¹⁹ Nã Cristo noikaspaifo nofe iyoafo, mã noikaspakani nomakinoax tsekeafõ. Afokai noko keskarafoma. Cristo anã shinãkanima, mã kachikiri faafo. Nãskax nomakinoax tsekeafono nõ tãpitiro afãfekai Cristo Ifofaafo. Akka a Cristo ãto Ifokõikẽ nomakinoax tsekekeranafoma.

²⁰ Akka Cristo ãfe Yõshi Shara mãto õiti mẽra nanea. Nãskakẽ keyokõichi mã mã tãpia Niospa Yõshi Sharapa mato tãpimapaiyai keskara.

²¹ Nãskata Jesucristo mã tãpikĩ finakõiakĩ. Tãpixõ mã mã chanĩmara fakĩ. Nãskakẽ ã mato kenexoni. Nãskaxõ afara mato pãraifãfe mã chanĩmara faima. Mã tãpia Jesucristo ramashara anorima ato yoimisma, nãfi chanĩmakõikĩ.

²² Yora fetsafo iskamisfo: “Cristokai Niospa nai mēraxō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikani.

²³ Akka nā Cristo noikaspaifāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikī iskafaifo: “Jesús Niospa Fakekōi,” fakanax nāfo Nios fe rafekani.

²⁴ Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā nikakī taefani keskafakī, mā shināmakiyamax mā nikakōisharaino Epa Nios fe āfe Fake Jesús mato fe rafekōipakenaka.

²⁵ Nāskakē Jesús noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

²⁶ Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsōa mato pārayamanō anorima yoikī.

²⁷ Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā toa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāратиroma. Nāskakē nikakōiyanā Cristo fe rafesharakōikāfe, a Niospa Yōshi Sharapa mato yoiāi keskai. A Niospa Yōshi Sharapa mato yoini keskai shināmakikakīma Cristo fe rafesharakāfe enekakīma.

²⁸ Ēfe fakefāfe, iskaratīa Cristo nikakōiyanā afe rafekōikāfe, mā nāmā fotofaino nō akiki me-

seimakai nōmāi isharakōiax. Askatari nō akiki rāfimakai.

²⁹ Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifokī.

3

Niospa fakefo

¹ Epa Niospa noko noikōi. Shināfāi ikāfe. “Ēfe fakefora,” noko famis. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa fakefofiano.

² Ēfe yora mīshtichi, ea nikakāfe. Nōfi iskaratīa Niospa fakekōifokī. Nāskakē afe keskarara chipo noko Niospa imai nō tāpiama. Cristo fotoaito nō ōiax nā keskarakōi nō iki, āfe ōiti keskarakōi.

³ Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shinākī nō anā chaka shināpaima. Jesucristo shināi keskarari nō shinātiro, anā chaka shināyamakī.

⁴ Akka yora fetsafāfe ato chakafakakī, āto chaka potakaspakani, a Niospa yoi ai keskara shinākanima, afara chaka fisti shināmisfo.

⁵ Jesucristo nai ariax nokoki fotoni nōko chaka noko soaxoxiki. Akka nāatofi afaa chakafamismakī. Nā fistifi finakōiakī. Ē mato yoi ai keskara mā mā tāpiakī.

⁶ Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma.

7 Ea nikasharakãfe, ã mato yoinõ. Fetsa iskatiro: “Ë Niospa meka mato yoinõ,” ixõ mato yoisharaima. Mato anorima tãpimapai, akka aa nikax mã chaka nitiro. Akka a isharakõixõ shinãsharamis. Aa keskarafi yora sharakõikĩ. A Cristo ika keskarari ari isharakõia shinãsharakõita. 8 Akka nã afara chakafamisfo Satanás fe rafeafo. Nã Satanásmãi taeyoi õiti chakaya inino, iskaratĩari nãskara. Nãskaxõ Satanás keyokõi yorafo afara chakafamapai. Nãskakẽ Niospa ãfe Fake nokoki nĩchini. Noko nãxoxiki nokoki ftoni, nõko chaka noko soaxoxiki. Nomakinoa Satanás potatiro noko afara chakafamapaiyaito. Nãskakẽ Jesucristo Satanás finõinĩfofana.

9 Akka Niospa ãfe Yõshi Shara nõmëra naneano nõ Niospa fake itiro. Nõ Niospa fakexõ nõ anã afaa chakafapaima. Nã Niospa Yõshi Shara nõko õiti mëra ikẽ nõ anã afaa chakafatiroma, nõko õiti noko fetsafaano. Nõko õiti noko fetsafaxõ, mã Niospa noko fakefa.

10 Fetsafãfe afara chakafamisfo, afokai Niospa fakefoma. Afofi aa ranã noinãkanima. Askarafo Niospa fakefoma. Afofi Satanás fakefoki. Nãskakẽ Satanás fakefo nõ tãpitiro. Nãskafakĩri Niospa fakefo nõ tãpitiro.

Nõa ranã nõ noinãtiro

11 Nãskakẽ taefakĩ mã Nios Ifofaxõ mã mã nikamiskĩ mato yoiaito: “Nõa ranã nõ noinãsharanõ,” ixõ mato yoiaito mã mã nikamis.

12 Akka nã Caín onefetsa noikaspakĩ reteni keskara iyamakãfe. Askara Satanás chaka fe rafea. Nãskaxõ onefetsa reteni noikaspakĩ, ã mato yoinõ nikakapo. A Niospa yoia keskafakĩ onefëtsa Nios

shināni. Akka Caín askanima. Āfe onefetsaki ōitifishkikī reteni. A onefētsa Nios Ifofaito ōikī noikaspakī reteni, Niosri noikaspayanā.

¹³ Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a Jesús Ifofaafāfema mato noikaspatirofo.

¹⁴ Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama.

¹⁵ Akka a yorafo noikaspaifo afofi retemit-samis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax.

¹⁶ Akka Jesús noko noikōikī, noko nāxoni. Āakōi nokoōnoax nani. Nāskarifiakī nō fetsafo noikōiax nō atoōnoax natiro.

¹⁷ Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima.

¹⁸ Efe yorafāfe, ea nikakōikāfe, ē mato yoinō. Fetsafo iskakani, āa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

Nō Nios nikasharax nō akiki ranotiroma

¹⁹ Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima.

20 Nāskafixō nōko ōiti mēraxō nō shinākī iskafatiro: “Ē afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko ōiti keskarama. Aato keyokōi tāpia.

21 Efe yora mīshtichi, ea nikasharakāfe. Nōko ōitinī nō shināi iskatiro: “Ē Nios Ifofaito ěfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma.

22 Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inimamasharaito.

23 Iskafakī noko yoini: “Ēfe Fake Jesucristo nikasharakōikāfe,” ixō noko yoini. Nāskatari a noko yoini keskai nōa ranā nō noināsharai.

24 Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

4

Niafaka chakata Niospa Yōshi Shara noikaspai. Askatari Cristo noikaspai

1 Efe yora mīshtichi, fetsafāfe mato anorima yoiaifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askaifono Niospa meka ōikī mā tāpitiro a yoiaifo keskara chanīmamākī. Niospa Yōshi

Sharaõxõ mato yoikanimakĩ. Akka afokai Niospa ato afaa yoiamá.

² Nãskakẽ ã mato yoisharai, ea nikakãfe. Fet-safãfe a Niospa meka mato tãpimasharaito mã tãpitiro. Niospa Yõshi Shara a mãra naneano yoiaito mã tãpitiro. Iskara mato yoiaito: “Jesu-cristo fotonĩ Apa ariax nai mãranoax. Nãfi yora keskara kãiniki. Aafi yorakõiki,” mato faito mã tãpitiro Niospa shinãmanaino mato askafakĩ yoiaito.

³ Akka yora fetsafãfe anori yoiyamaifãfe nõ tãpitiro afãfe Jesucristo noikaspamisfo, Niospa Yõshi Shara ãto mãra naneama. Satanás ato shinãmamis. Akka a Cristo noikaspaifo noko ano fexikani mã mã nikamis. Akka iskaratã mã noko ano feafo, afãfe Cristo noikaspamisfo.

⁴ Akka mãroko askaramakĩ efe yorafãfe, Niosfi mãto Ifokõikĩ, mãfi Niospa yorakõifokĩ. ãfe Yõshi Shara mã mãto õiti mãra nanea. Akka a anorima shinãifo askarafoma, Satanás yõshi ãto õiti mãra nanea. Akka Niospa Yõshi Shara mato mãra naneano mã Satanás finõkõia.

⁵ Akka fetsafãfe Nios tãpiafomano, nãskakẽ anorima ato yoimisfo, Satanás ato shinãmanaino. Nãskakẽ Satanás ifofaafãfe ato nikamis Satanásmãĩ ãto ifokẽ.

⁶ Akka nõfi Niospa yorafokĩ. Nãskakẽ a Nios tãpiafãfe noko nikakõitirofo nõ yoiai anori. Akka a Nios Ifofaafãfema a nõ yoiai anori nikatirofoma. Akka nõ tãpitiro ato mãra Niospa Yõshi Shara naneano noko nikasharaifono. Ato mãra nanexõ fanĩrira ato shinãmanima. Akka a noko nikaifoma ato mãra Satanás nanea. Satanás ato mãra nanexõ fanĩrira ato shinãmani. Satanás chanĩ finakõia.

Nāskax ōiti chakaya.

Niospa noko noikōi

⁷ Efe yora mīshtichi, nō noinākōinō, Niospa noko ato noimanō. Nios fistichi noko shināmatio nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano.

⁸ Niospa yorafo noikōia. Nāskaxō ato noikī noko tāpimatio. Akka a yorafo noiaifāfema, Nios tāpiafoma.

⁹ Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatio, nāatomāi nōko chaka noko soaxomiskē. Nāskakē Niospa noko ōimani afeskaxō noko noimākai.

¹⁰ Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

¹¹ Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe.

¹² Akka tsoa pishta Nios ōimisma. Nāskafiax nō noināino, Nios nōmēra ika. Nofe ixō yorafo noko noimasharatio.

¹³ Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano.

¹⁴ Epa Niospa nai arixō āfe Fake noko nāmā nīchixonī. Āfe Fake nāmānoa nō ōipaoni. Ōipaonixakī nō ato yoimis iskafakī: “Epa Niospa āfe Fake noko nāmā nīchixonī, keyokōi nokoōnoax nanō nōko chaka noko soaxoxiki noko ifiano nō afe ipaxanō.”

¹⁵ Fetsa iskai: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

16 Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorafo noimatiro. Akka nō ato noikōiaino Nios nofe ika, afe nō rafekōia.

17 Nō Nios noi. Nō Nios noikī finakōiax nō inimatiro Jesús anā nāmā fotoano. Anā fotoxō noko iskafatiro: “Nā ea Ifofaafo tii ēfe Epa Nios ari fokani. Akka nā ea Ifofaafoma tii ēfe Epa ari fokanima, nā omiskōipakenakafo mēra fokani,” ato fatiro. Ato askafaino nōkai Nioski meseima. Nō ranoima nō afe rafekōi. Afe rafei nō Jesús keskara iki, āfe ōiti keskara nō iki. Nāskakē Jesús oaitīa nō akiki meseima.

18 Nō Nios noikōiax nō akiki mesetiroma. Nōko shinā mēraxō nō Nios noikī finakōiax nō rate potatiro. Akka fētsa mesekī iskafai: “Niospa ea omiskōimani,” ixō shināi aatokai noikī finakōiama. Ato noikōiamax Nioski mesetiroma.

19 Nō Nios noi yamatai noko noikī taefani. Akka noko taefakī noinikē iskaratīari nōri nō aō noi.

20 Akka fetsafo iskakani: “Ē Nios noi,” ifiaxō a Nios Ifofaafo noima, anorima yoimisfo. Mā afe yorafo ōifikī atokairoko noikatsaxakakī, Niosri noisharakanima askara ōiroko fakatsaxakakī.

21 Niospa noko yoimis: “Ea noixō nā ea Ifofaafari noikāfe,” noko famis.

5

Nō Nios Ifofakē tsōa noko afaa chakafamatiroma

¹ Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara

fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro.

² Nō Nios noikōikī noko yoiyai keskara nō nikai. Nāskaxō mā nō tāpia nō Niospa fakefori noikōi.

³ Nō Nios noikōixō āfe meka nō nikakōikī a noko yoiyai keskara nō nikai nō fekaxteima.

⁴ Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro.

⁵ Afara chakafo noko amapaiyai fo keskara Niospa noko amatiroma nō anōma. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

Niospa āfe Fakekōi noko ōimani

⁶ Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanīmisma nōmēra nanexō noko yoimis Jesús Niospa Fakekōi.

⁷ Nā trespato yoimisfo Jesús Niospa Fakekōi.

⁸ Jesús faka mēra maotisini shināta, askatari naino āfe imi foni shināta, askatari Niospa Yōshi Sharapa noko yoiaino, nānorifos nā trespa shināmisfo.

⁹ Akka yorafāfe noko afara yoiaito ato chanīmara fata a Niospa noko yoiari nō chanīmara fakī finakōitiro. Akai yora keskarama, afi Nioskōikī. Akka āfe Fakeōnoa noko yoiaito nō chanīmara fakōitiro.

10 Akka Niospa Fake chanĩmara faxõ Apa Niospa aõnoa yoini keskara ãfe õiti mēraxõ chanĩmara fatirofo. Nãskafekē ãfe Fakeõnoa yoimis keskara tsõa chanĩmara fayamaxõ, “Nios chanĩra,” fakaxõ yorafo fanĩrira shinãmapaikani.

11 Nãskakē Nios iskamis: “Ë mato nimasharapaketiro ěfe Fake Jesúsxõ,” ixõ noko iskafamis. Nãskakē nõ Jesús Ifofaax nõ afe nĩpaxatiro.

12 A Niospa Fake Ifofaifo afe nĩpaxatirofo. Akka a Ifofaima afe nĩpaxatirofoma.

Mã mekai xatekĩ ato yoisharani

13 Mã Niospa Fake chanĩmara faaki. Nãskakē ě mato kirika kenexoni, mã tãpinõ mã afe nĩpanaka.

14 Nõ afara sharafo nõ fichipaikĩ, a Niospa noko shinãmanaino, nõ Nios yoitiro kĩfikĩ, a Niospa fichipaiyai keskafakĩ. Nõ askakĩ nõ tãpitiro Niospamãi noko nikasharamiskē.

15 Nãskakē nõ tãpitiro a nõ Nios yoiaito noko nikaito noko nikaxõ noko afara inãtiro nõ yõkaito.

16 Akka a Nios Ifofaa fētsa afara chakafaito õikĩ, a Nios Ifofaa fētsa Nios kĩfixotiro ãfe chaka xatenõ. Akka Epa Niospa ato nimatiro isharapakexanõfo. Askafikanax fetsafãfe oa Nios Ifofaafõ keskara iyokanax mã potakaxõ chaka shinãfãikakĩ Nios kachikiri fakõinafo. Askarafokai tsõa ato nimatiroma nĩpaxanõfo. Naax omiskõipakenakafo mēra fokani. Atoõnoa Epa Nios kĩfixokãfe ixõ ě mato yoiaama.

17 A Niospa noko yoiai keskara nõ nikayamaxõ nõ chaka shinãi. Askafixõ anã nõ chaka xatepaiyaito õikĩ nõko õiti noko fetsafaxotiro, nõ anã chaka shinãpaiyamanõ.

¹⁸ Mã nõ Nios Ifofaano, noko fakefai. Nõ ãfe fake ixõ nõ tâpia nõ anã chaka shinãpaima, mãmãi noko Niospa õiti fetsafaano. Mã nõ askano Satanás afara anã noko chakafamapaiyaito, Niospa Fakekõichi Jesús noko ifixõ noko kexesharatiro. Noko askafakẽ Satanás noko afeska fatiroma.

¹⁹ Mã nõ tâpia nõ Niospa fake. Akka fetsafãfe Nios nikakaspafono, afo Satanás ato shinãmani ãto ifo inõfo.

²⁰ Niospa Fake nokoki oni. Noko tâpimaniyoi ãfe Apa nõ tâpisharakõinõ. ãfe Apafi mẽstekõi ikaki. Akka nõ Jesús fe rafeax ãfe Apa feri nõ rafetiro. Nã Jesucristo Niospa Fake. Nãri Nioskõi. Nãskakẽ noko nimapakexatiro.

²¹ Efe yora mĩshtichi, Nios fisti Ifofakãfe. Satanás mato afara chakafamapaiyaito afe rafeyamakãfe. Askatari afara chakafo mã ifofapaikĩ afo shinãyamakãfe. Nios fisti shinãkãfe.

Nã tii ã mato kirika kenexõ fomai, efe yora mĩshtichi.

Ëkã Juan

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

6c7b7ce2-9d87-5405-91e6-71ce1387adcc